

【 卷上 】

一、東

雲對雨，雪對風，晚照對晴空。來鴻對去燕，宿鳥對鳴蟲。
三尺劍，六鈞弓，嶺北對江東。人間清暑殿，天上廣寒宮。
夾岸曉煙楊柳綠，滿園春雨杏花紅。
兩鬢風霜途次早行之客；一蓑煙雨溪邊晚釣之翁。

沿對革，異對同，白叟對黃童。江風對海霧，牧子對漁翁。
顏巷陋，阮途窮，冀北對遼東，池中濯足水，門外打頭風。
梁帝講經同泰寺，漢皇置酒未央宮。
塵慮縈心懶撫七弦綠綺；霜華滿鬢羞看百煉青銅。

貧對富，塞對通，野叟對溪童。鬢皤對眉綠，齒皓對唇紅。
天浩浩，日融融，佩劍對彎弓。半溪流水綠，千樹落花紅。
野渡燕穿楊柳雨，芳池魚戲芰荷風。
女子眉纖額下現一彎新月；男兒氣壯胸中吐萬丈長虹。

二、冬

春對夏，秋對冬，暮鼓對晨鐘。觀山對玩水，綠竹對蒼松。
馮婦虎，葉公龍，舞蝶對鳴蛩。銜泥雙紫燕，課蜜幾黃蜂。
春日園中鶯恰恰，秋天塞外雁離離。
秦嶺雲橫迢遞八千遠路；巫山雨洗嵯峨十二危峰。

明對暗，淡對濃，上智對中庸。鏡奩對衣笥，野杵對村舂。
花灼爍，草蒙茸，九夏對三冬。臺高名戲馬，齋小號蟠龍。
手擘蟹螯從畢卓，身披鶴氅自王恭。
五老峰高秀插雲霄如玉筆；三姑石大響傳風雨若金鏞。

仁對義，讓對恭，禹舜對羲農。雪花對雲葉，芍藥對芙蓉。
陳後主，漢中宗，繡虎對雕龍。柳塘風淡淡，花圃月濃濃。
春日正宜朝看蝶，秋風那更夜聞蛩。
戰士邀功必借干戈成勇武；逸民適志須憑詩酒養疏慵。

三、江

樓對閣，戶對窗，巨海對長江。蓉裳對蕙帳，玉斝對銀缸。
青布幔，碧油幢，寶劍對金缸。忠心安社稷，利口覆家邦。
世祖中興延馬武，桀王失道殺龍逢。
秋雨瀟瀟漫爛黃花初滿徑；春風裊裊扶疏綠竹正盈窗。

旌對旆，蓋對幢，故國對他邦。千山對萬水，九澤對三江。
山岌岌，水淙淙，鼓振對鐘撞。清風生酒舍，皓月照書窗。

陣上倒戈辛紂戰，道旁繫劍子嬰降。
夏日池塘出汲浴波鷗對對；春風簾幕往來營壘燕雙雙。

銖對兩，隻對雙，華嶽對湘江。朝車對禁鼓，宿火對寒缸。
青瑣闥，碧紗窗，漢社對周邦。笙簫鳴細細，鐘鼓響摐摐。
主簿棲鸞名有覽，治中展驥姓惟龐。
蘇武牧羊雪屢餐於北海；莊周活鮒水必決於西江。

四、支

茶對酒，賦對詩，燕子對鶯兒。栽花對種竹，落絮對游絲。
四目頡，一足夔，鳩鴿對鷺鷥。半池紅菡萏，一架白茶糜。
幾陣秋風能應候，一犁春雨甚知時。
智伯恩深國士吞變形之炭；羊公德大邑人豎墮淚之碑。

行對止，速對遲，舞劍對圍棋。花箋對草字，竹簡對毛錐。
汾水鼎，峴山碑，虎豹對熊羆。花開紅錦繡，水漾碧琉璃。
去婦因探鄰舍棗，出妻爲種後園葵。
笛韻和諧仙管恰從雲裡降；櫓聲咿軋漁舟正向雪中移。

戈對甲，鼓對旗，紫燕對黃鸝。酸梅對李苦，青眼對白眉。
三弄笛，一圍棋，雨打對風吹。海棠春睡早，楊柳晝眠遲。
張駿曾爲槐樹賦，杜陵不做海棠詩。
晉士特奇可比一斑之豹；唐儒博識堪爲五總之龜。

五、微

來對往，密對稀，燕舞對鶯飛。風清對月朗，露重對煙微。
霜菊瘦，雨梅肥，客路對魚磯。晚霞舒錦繡，朝露綴珠璣。
夏暑客思欹石枕，秋寒婦念寄邊衣。
春水才深青草岸邊漁父去；夕陽半落綠莎原上牧童歸。

寬對猛，是對非，服美對乘肥。珊瑚對玳瑁，錦繡對珠璣。
桃灼灼，柳依依，綠暗對紅稀。窗前鶯並語，簾外燕雙飛。
漢致太平三尺劍，周臻大定一戎衣。
吟成賞月之詩只愁月墮；斟滿送春之酒惟憾春歸。

聲對色，飽對飢，虎節對龍旗。楊花對桂葉，白簡對朱衣。
虬也吠，燕子非，蕩蕩對巍巍。春暄資日氣，秋吟借霜威。
出使振威馮奉世，治民異等尹翁歸。
燕我弟兄載詠棣棠韡韡；命伊將帥爲歌楊柳依依。

六、魚

無對有，實對虛，作賦對觀書。綠窗對朱戶，寶馬對香車。
伯樂馬，浩然驢，弋雁對求魚。分金齊鮑叔，奉璧藺相如。
擲地金聲孫綽賦，回文錦字竇滔書。
未遇殷宗胥靡困傅岩之築；既逢周後太公舍渭水之魚。

終對始，疾對徐，短褐對華裾。六朝對三國，天祿對石渠。
千字策，八行書，有若對相如。花殘無戲蝶，藻密有潛魚。
落葉舞風高復下，小荷浮水捲還舒。
愛見人長共服宣尼休假蓋；恐彰己吝誰知阮裕竟焚車。

麟對鳳，鱉對魚，內史對中書。犁鋤對耒耜，畎澮對郊墟。
犀角帶，象牙梳，駟馬對安車。青衣能報赦，黃耳解傳書。
庭畔有人持短劍，門前無客曳長裾。
波浪拍船駭舟人之水宿；峰巒繞舍樂隱者之山居。

七、虞

金對玉，寶對珠，玉兔對金烏。孤舟對短棹，一雁對雙鳧。
橫醉眼，捻吟鬚，李白對楊朱。秋霜多過雁，夜月有啼烏。
日暖園林花易賞，雪寒村舍酒難沽。
人處嶺南善探巨象口中齒；客居江左偶奪驪龍頷下珠。

賢對聖，智對愚，傅粉對施朱。名韁對利鎖，挈榼對提壺。
鳩哺子，燕調雛，石帳對郇廚。煙青籠岸柳，風急撼庭梧。
鵠眼一方端石硯，龍涎三炷博山爐。
曲沼魚多可使漁人結網；平田兔少漫勞耕者守株。

秦對趙，越對吳，釣客對耕夫。箕裘對杖履，杞梓對桑榆。
天欲曉，日將晡，狡兔對妖狐。讀書甘刺股，煮粥惜焚鬚。
韓信武能平四海，左思文足賦三都。
嘉遁幽人適志竹籬茅舍；勝遊公子玩情柳陌花衢。

八、齊

岩對岫，澗對溪，遠岸對危堤。鶴長對鳧短，水雁對山雞。
星拱北，月流西，漢露對湯霓。桃林牛已放，虞阪馬長嘶。
叔侄去官聞廣受，弟兄讓國有夷齊。
三月春濃芍藥叢中蝴蝶舞；五更天曉海棠枝上子規啼。

雲對雨，水對泥，白壁對玄圭。獻瓜對投李，禁鼓對征鼙。
徐稚榻，魯班梯，鳳翥對鸞棲。有官清似水，無客醉如泥。
截髮惟聞陶侃母，斷機只見樂羊妻。
秋望佳人目送樓頭千里雁；早行遠客夢驚枕上五更雞。

熊對虎，象對犀，霹靂對虹霓。杜鵑對孔雀，桂嶺對梅溪。
蕭史鳳，宋宗雞，遠近對高低。水寒魚不躍，林茂鳥頻棲。
楊柳和煙彭澤縣，桃花流水武陵溪。
公子追歡閒驟玉驄遊綺陌；佳人倦繡悶欹珊枕掩香闥。

九、佳

河對海，漢對淮，赤岸對朱崖。鷺飛對魚躍，寶鈿對金釵。
魚圍圍，鳥啾啾，草履對芒鞋。古賢崇篤厚，時輩喜詼諧。
孟訓文公談性善，顏師孔子問心齋。
緩撫琴弦像流鶯而並語；斜排箏柱類過雁之相挨。

豐對儉，等對差，布襖對荆釵。雁行對魚陣，榆塞對蘭崖。
挑薺女，採蓮娃，菊徑對苔階。詩成六義備，樂奏八音諧。
造律吏哀秦法酷，知音人說鄭聲哇。
天欲飛霜塞上有鴻行已過；雲將做雨庭前多蟻陣先排。

城對市，巷對街，破屋對空階。桃枝對桂葉，砌蚓對牆蝸。
梅可望，橘堪懷，季路對高柴。花藏沽酒市，竹映讀書齋。
馬首不容孤竹扣，車輪終就洛陽埋。
朝宰錦衣貴束烏犀之帶；宮人寶髻宜簪白燕之釵。

十、灰

增對損，閉對開，碧草對蒼苔。書簽對筆架，兩曜對三台。
周召虎，宋桓魋，閬苑對蓬萊。薰風生殿閣，皓月照樓臺。
卻馬漢文思罷獻，吞蝗唐太冀移災。
照耀八荒赫赫麗天秋日；震驚百里轟轟出地春雷。

沙對水，火對灰，雨雪對風雷。書淫對傳癖，水滸對岩隈。
歌舊曲，釀新醅，舞館對歌臺。春棠經雨放，秋菊傲霜開。
作酒固難忘麴蘖，調羹必要用鹽梅。
月滿庾樓據胡床而可玩；花開唐苑轟羯鼓以奚催。

休對咎，福對災，象箸對犀杯。宮花對御柳，峻閣對高臺。
花蓓蕾，草根芟，剔蘚對剝苔。雨前庭蟻鬧，霜後陣鴻哀。
元亮南窗今日傲，孫弘東閣幾時開。
平展青茵野外茸茸軟草；高張翠幄庭前鬱鬱涼槐。

十一、真

邪對正，假對真，獬豸對麒麟。韓盧對蘇雁，陸橘對莊椿。
韓五鬼，李三人，北魏對西秦。蟬鳴哀暮夏，鶯囀怨殘春。
野燒焰騰紅燦燦，溪流波皺碧粼粼。
行無蹤居無廬頌成酒德；動有時藏有節論著錢神。

哀對樂，富對貧，好友對嘉賓。彈冠對結綬，白日對青春。
金翡翠，玉麒麟，虎瓜對龍麟。柳塘生細浪，花徑起香塵。
閒愛登山穿謝屐，醉思瀟酒脫陶巾。
雪冷霜嚴倚檻松筠同傲歲；日遲風暖滿園花柳各爭春。

香對火，炭對薪，日觀對天津。禪心對道眼，野婦對宮嬪。
仁無敵，德有鄰，萬石對千鈞。滔滔三峽水，冉冉一溪冰。
充國功名當畫閣，子張言行貴書紳。
篤志詩書思入聖賢絕域；忘情官爵羞沾名利纖塵。

十二、文

家對國，武對文，四輔對三軍。九經對三史，菊馥對蘭芬。
歌北鄙，詠南薰，邇聽對遙聞。召公周太保，李廣漢將軍。
聞化蜀民皆草偃，爭權晉土已瓜分。
巫峽夜深猿嘯苦哀巴地月；衡峰秋早雁飛高貼楚天雲。

欵對正，見對聞，偃武對修文。羊車對鶴駕，朝旭對晚曛。
花有艷，竹成文，馬燧對羊欣。山中梁宰相，樹下漢將軍。
施帳解圍嘉道韞，當壚沽酒嘆文君。
好景有期北嶺幾枝梅似雪；豐年先兆西郊千頃稼如雲。

堯對舜，夏對殷，蔡惠對劉賁。山明對水秀，五典對三墳。
唐李杜，晉機雲，事父對忠君。雨晴鳩喚婦，霜冷雁呼群。
酒量洪深周僕射，詩才俊逸鮑參軍。
鳥翼長隨鳳兮洵眾禽長；狐威不假虎也真百獸尊。

十三、元

幽對顯，寂對喧，柳岸對桃源。鶯朋對燕友，早暮對寒暄。
魚躍沼，鶴乘軒，醉膽對吟魂。輕塵生范甑，積雪擁袁門。
縷縷輕煙芳草渡，絲絲微雨杏花村。
詣闕王通獻太平十二策；出關老子著道德五千言。

兒對女，子對孫，藥圃對花村。高樓對邃閣，赤豹對玄猿。
妃子騎，夫人軒，曠野對平原。匏巴能鼓瑟，伯氏善吹埙。
馥馥早梅思驛使，萋萋芳草怨王孫。
秋夕月明蘇子黃崗遊赤壁；春朝花發石家金谷啓芳園。

歌對舞，德對恩，犬馬對雞豚。龍池對鳳沼，雨驟對雲屯。
劉向閣，李膺門，唳鶴對啼猿。柳搖春白晝，梅弄月黃昏。
歲冷松筠皆有節，春喧桃李本無言。
噪晚齊蟬歲歲秋來泣恨；啼宵蜀鳥年年春去傷魂。

十四、寒

多對少，易對難，虎踞對龍蟠。龍舟對鳳輦，白鶴對青鸞。
風淅淅，露漙漙，繡轂對雕鞍。魚游荷葉沼，鷺立蓼花灘。
有酒阮貂奚用解，無魚馮鈇必須彈。
丁固夢松柯葉忽然生腹上；文郎畫竹枝梢倏爾長毫端。

寒對暑，濕對乾，魯隱對齊桓。寒氈對暖席，夜飲對晨餐。
叔子帶，仲由冠，郝廓對邯鄲。嘉禾憂夏旱，衰柳耐秋寒。
楊柳綠遮元亮宅，杏花紅映仲尼壇。
江水流長環繞似青羅帶；海蟾輪滿澄明如白玉盤。

橫對豎，窄對寬，黑痣對彈丸。珠簾對畫棟，彩檻對雕欄。
春既老，夜將闌，百辟對千官。懷仁稱足足，抱義美般般。
好馬君王曾市骨，食豬處士僅思肝。
世仰雙仙元禮舟中攜郭泰；人稱連璧夏侯車上並潘安。

十五、刪

興對廢，附對攀，露草對霜菅。歌廉對借寇，習孔對希顏。
山壘壘，水潺潺，奉璧對探環。禮由公旦作，詩本仲尼刪。
驢困客方經灞水，雞鳴人已出函關。
幾夜霜飛已有蒼鴻辭北塞；數朝霧暗豈無玄豹隱南山。

猶對尙，侈對慳，霧髻對煙鬟。鶯啼對鶻噪，獨鶴對雙鷗。
黃牛峽，金馬山，結草對銜環。昆山惟玉集，合浦有珠還。
阮藉舊能爲眼白，老萊新愛著衣斑。
棲遲避世人草衣木食，窈窕傾城女雲鬢花顏。

姚對宋，柳對顏，賞善對懲奸。愁中對夢裡，巧慧對痴頑。
孔北海，謝東山，使越對征蠻。淫聲聞濮上，離曲聽陽關。
驍將袍披仁貴白，小兒衣著老萊斑。
茅舍無人難卻塵埃生榻上；竹亭有客尙留風月在窗間。

【卷下】

一、先

晴對雨，地對天，天地對山川。山川對草木，赤壁對青田。
郝廓鼎，武城弦，木筆對苔錢。金城三月柳，玉井九秋蓮。
何處春朝風景好，誰家秋夜月華圓。
珠綴花梢千點薔薇香露；練橫樹杪幾絲楊柳殘煙。

前對後，後對先，眾醜對孤妍。鶯簧對蝶板，虎穴對龍淵。
擊石磬，觀韋編，鼠目對鳶肩。春園花柳地，秋沼芰荷天。

白羽頻揮閒客坐，烏紗半墜醉翁眠。
野店幾家羊角風搖沽酒旆；長川一帶鴨頭波泛打漁船。

离對坎，震對乾，一日對千年。堯天對舜日，蜀水對秦川。
蘇武節，鄭虔氈，澗壑對林泉。揮戈能退日，持管莫窺天。
寒食芳辰花爛熳，中秋佳節月嬋娟。
夢裡榮華飄忽枕中之客；壺中日月安閒市上之仙。

二、蕭

恭對慢，吝對驕，水遠對山遙。松軒對竹檻，雪賦對風謠。
乘五馬，貫雙鷗，燭滅對香消。明蟾常徹夜，驟雨不終朝。
樓閣天涼風颯颯，關河地隔雨瀟瀟。
幾點鷺鷥日暮常飛紅蓼岸；一雙鸕鶿春朝頻泛綠楊橋。

開對落，暗對昭，趙瑟對虞韶。軺車對驛騎，錦繡對瓊瑤。
羞攘臂，懶折腰，范甑對顏瓢。寒天駕帳酒，夜月鳳臺簫。
舞女腰肢楊柳軟，佳人顏貌海棠嬌。
豪客尋春南陌草青香陣陣；閒人避暑東堂蕉綠影搖搖。

班對馬，董對晁，夏晝對春宵。雷聲對電影，麥穗對禾苗。
八千路，廿四橋，總角對垂髫。露桃勻嫩臉，風柳舞纖腰。
賈誼賦成傷鵬鳥，周公詩就托鴟鴞。
幽寺尋僧逸興豈知俄爾盡；長亭送客離魂不覺黯然消。

三、肴

風對雅，象對爻，巨鱗對長蛟。天文對地理，蟋蟀對螻蛄。
龍夭矯，虎咆哮，北學對東膠。築臺須壘土，成屋必誅茅。
潘岳不忘秋興賦，邊韶常被晝眠嘲。
撫養群黎已見國家隆治；滋生萬物方知天地泰交。

蛇對虺，蜃對蛟，麟藪對鵲巢。風聲對月色，麥穗對桑苞。
何妥難，子雲嘲，楚甸對商郊。五音惟耳聽，萬慮在心包。
葛被湯征因仇餉，楚遭齊伐責包茅。
高矣若天洵是聖人大道；淡而如水實為君子神交。

牛對馬，犬對貓，旨酒對嘉肴。桃紅對柳綠，竹葉對松梢。
藜杖叟，布衣樵，北野對東郊。白駒形皎皎，黃鳥語交交。
花圃春殘無客到，柴門夜永有僧敲。
墻畔佳人飄揚競把鞦韆舞；樓前公子笑語爭將蹴鞠拋。

四、豪

琴對瑟，劍對刀，地迴對天高。峨冠對博帶，紫綬對緋袍。
煎異茗，酌香醪，虎兕對猿猱。武夫攻騎射，野婦務蠶繅。
秋雨一川淇澳竹，春風兩岸武陵桃。
螺髻青濃樓外晚山千仞；鴨頭綠膩溪中春水半篙。

刑對賞，貶對褒，鉞斧對征袍。梧桐對橘柚，枳棘對蓬蒿。
雷煥劍，呂虔刀，橄欖對葡萄。一椽書舍小，百尺酒樓高。
李白能詩時秉筆，劉伶愛酒每鋪糟。
禮別尊卑拱北眾星常燦燦；勢分高下朝東萬水自滔滔。

瓜對果，李對桃，犬子對羊羔。春分對夏至，谷水對山濤。
雙鳳翼，九牛毛，主逸對臣勞。水流無限闊，山聳有餘高。
雨打村童新牧笠，塵生邊將舊征袍。
俊士居官榮引鵷鴻之序；忠臣報國誓殫犬馬之勞。

五、歌

山對水，海對河，雪竹對煙蘿。新歡對舊恨，痛飲對高歌。
琴再撫，劍重磨，媚柳對枯荷。荷盤從雨洗，柳線任風搓。
飲酒豈知欷醉帽，觀棋不覺爛樵柯。
山寺清幽直踞千層雲嶺；江樓宏敞遙臨萬頃煙波。

繁對簡，少對多，里詠對途歌。官情對旅況，銀鹿對銅駝。
刺吏鳴，將軍鵝，玉律對金科。古堤垂鞞柳，曲沼長新荷。
命駕呂因思叔夜，引車藺爲避廉頗。
千尺水簾今古無人能手捲；一輪月鏡乾坤何匠用功磨。

霜對露，浪對波，徑菊對池荷。酒闌對歌罷，日暖對風和。
梁父詠，楚狂歌，放鶴對觀鵝。史才推永叔，刀筆仰蕭何。
種橘猶嫌千樹少，寄梅誰信一枝多。
林下風生黃髮村童攜牧笠；江頭日出皓眉溪叟曬漁蓑。

六、麻

松對柏，縷對麻，蟻陣對蜂衙。鱗鱗對白鷺，凍雀對昏鴉。
白墮酒，碧沉茶，品笛對吹茄。秋涼梧墮葉，春暖杏開花。
雨長苔痕侵壁砌，月移梅影上窗紗。
颯颯秋風度城頭之筆簾；遲遲晚照動江上之琵琶。

優對劣，凸對窠，翠竹對黃花。松杉對杞梓，菽麥對桑麻。
山不斷，水無涯，煮酒對烹茶。魚游池面水，鷺立岸頭沙。
百畝風翻陶令秫，一畦雨熟邵平瓜。
閒捧竹根飲李白一壺之酒；偶擎桐葉啜盧仝七碗之茶。

吳對楚，蜀對巴，落日對流霞。酒錢對詩債，柏葉對松花。
馳驛騎，泛仙槎，碧玉對丹砂。設橋偏送筍，開道竟還瓜。
楚國大夫沉汨水，洛陽才子謫長沙。
書篋琴囊乃士流活計；藥爐茶鼎實閒客生涯。

七、陽

高對下，短對長，柳影對花香。詞人對賦客，五帝對三王。
深院落，小池塘，晚眺對晨妝。絳霄唐帝殿，綠野晉公堂。
寒集謝莊衣上雪，秋添潘岳鬢邊霜。
入浴蘭湯事不忘於端午；客斟菊酒典常記於重陽。

堯對舜，禹對湯，晉宋對隋唐。奇花對異草，夏日對秋霜。
八叉手，九回腸，地久對天長。一堤楊柳綠，三徑菊花黃。
聞鼓塞兵方戰鬥，聽鐘宮女正梳妝。
春飲方歸紗帽半掩鄰舍酒；早朝初退袞衣微惹御爐香。

荀對孟，老對莊，鞞柳對垂楊。仙宮對梵宇，小閣對長廊。
風月窟，水雲鄉，蟋蟀對螳螂。暖煙香靄靄，寒燭影煌煌。
伍子欲酬漁父劍，韓生嘗竊賈公香。
三月韶光常憶花明柳媚；一年好景難忘橘綠橙黃。

八、庚

深對淺，重對輕，有影對無聲。蜂腰對蝶翅，宿醉對餘醒。
天北缺，日東生，獨臥對同行。寒冰三尺厚，秋月十分明。
萬卷書容閒客覽，一樽酒待故人傾。
心侈唐玄厭看霓裳之曲；意驕陳主飽聞玉樹之賡。

虛對實，送對迎，後甲對先庚。鼓琴對舍瑟，搏虎對騎鯨。
金匱匣，玉璫琤，玉宇對金莖。花間雙粉蝶，柳內幾黃鶯。
貧裡每甘黍藿味，醉中厭聽管弦聲。
腸斷秋閨涼吹已侵重被冷；夢驚曉枕殘蟾猶照半窗明。

漁對獵，釣對耕，玉振對金聲。雉城對雁塞，柳裊對葵傾。
吹玉笛，弄銀笙，阮杖對桓箏。墨呼松處士，紙號楮先生。
雨浥好花潘岳縣，風搓細柳亞夫營。
撫動琴弦遽覺座中風雨至；哦成詩句應知窗外鬼神驚。

九、青

紅對紫，白對青，漁火對禪燈。唐詩對漢史，釋典對仙經。
龜曳尾，鶴梳翎，月榭對風亭。一輪秋夜月，幾點曉天星。
晉士只知山簡醉，楚人誰識屈原醒。

倦繡佳人慵把鴛鴦文作枕；吮毫畫者思將孔雀寫爲屏。

行對坐，醉對醒，佩紫對紆青。棋枰對筆架，雨雪對雷霆。
狂蛺蝶，小蜻蜓，水岸對沙汀。天臺孫綽賦，劍閣孟陽銘。
傳信子卿千里雁，照書車胤一囊螢。
冉冉白雲夜半高遮千里月；澄澄碧水宵中寒映一天星。

書對畫，傳對經，鸚鵡對鵲鴿。黃茅對白荻，綠草對青萍。
風繞鋒，雨淋鈴，水閣對山亭。渚蓮千朵白，岸柳兩行青。
漢代宮中生秀柞，堯時階畔長祥蓂。
一枰決勝棋子分黑白；半幅通靈畫色間丹青。

十、蒸

新對舊，降對升，白犬對蒼鷹。葛巾對藜杖，澗水對池冰。
張兔網，掛魚罾，燕雀對鸚鵡。爐中煎藥火，窗下讀書燈。
織錦逐梭成舞鳳，畫屏誤筆作飛蠅。
宴客劉公座上滿斟三雅爵；迎仙漢帝宮中高插九光燈。

儒對士，佛對僧，面友對心朋。春殘對夏老，夜寢對晨興。
千里馬，九霄鵬，霞蔚對雲蒸，寒堆陰嶺雪，春泮水池冰。
嚴父憤生撞玉斗，周公誓死作金滕。
將軍元暉莫怪人譏爲餓虎；待中盧昶難逃世號作飢鷹。

規對矩，墨對繩，獨步對同登。吟哦對諷詠，訪友對尋僧。
風繞屋，水襄陵，紫鷓對蒼鷹。烏寒驚夜月，魚暖上春冰。
楊子口中飛白鳳，何郎鼻上集青蠅。
巨鯉躍池翻幾重之密藻；顛猿飲澗掛百尺之垂藤。

十一、尤

榮對辱，喜對憂，夜宴對春遊。燕關對楚水，蜀犬對吳牛。
茶敵睡，酒消愁，青眼對白頭。馬遷修史記，孔子作春秋。
適興子猷常泛棹，思歸王粲強登樓。
窗下佳人妝罷重將金插鬢；筵前舞妓曲終還要錦纏頭。

唇對齒，角對頭，策馬對騎牛。毫尖對筆底，綺閣對雕樓。
揚柳岸，荻蘆洲，語燕對啼鳩。客乘金絡馬，人泛木蘭舟。
綠野耕夫春舉耜，碧池漁父晚垂鉤。
波浪千層喜見蛟龍行水；雲霄萬里驚看雕鶚橫秋。

庵對寺，殿對樓，酒艇對漁舟。金龍對彩鳳，豮豕對童牛。
王郎帽，蘇子裘，四季對三秋。峰巒扶地秀，江漢接天流。
一灣綠水漁村小，萬里青山佛寺幽。
龍馬呈河羲皇闡微而畫卦；神龜出洛禹王取法以陳疇。

十二、侵

眉對目，口對心，錦瑟對瑤琴。曉耕對寒釣，晚笛對秋砧。
松鬱鬱，竹森森，閔損對曾參。秦王親擊磬，虞帝自揮琴。
三獻卞和嘗泣玉，四知楊震固辭金。
寂寂秋朝庭葉因霜摧嫩色；沉沉春夜砌花隨月轉清陰。

前對後，古對今，野獸對山禽。犍牛對牝馬，水淺對山深。
曾點瑟，戴逵琴，璞玉對渾金。艷紅花弄色，濃綠柳敷陰。
不雨湯王方剪爪，有風楚子正披襟。
書生惜壯歲韶華寸陰尺璧，遊子愛良宵光陰一刻千金。

絲對竹，劍對琴，素志對丹心。千愁對一醉，虎嘯對龍吟。
子罕玉，不疑金，往古對來今。天寒鄒吹律，歲旱傅爲霖。
渠說子規爲帝魄，儂知孔雀是家禽。
屈子沉江處處舟中爭繫粽；牛郎渡渚家家臺上競穿針。

十三、覃

千對百，兩對三，地北對天南。佛堂對仙洞，道院對禪庵。
山潑黛，水浮藍，雪嶺對雲潭。鳳飛方翩翩，虎視已眈眈。
窗下書生時諷詠，筵前酒客日醺酣。
白草滿郊秋日收征人之馬；綠桑盈畝春時供農婦之蠶。

將對欲，可對堪，德被對恩覃。權衡對尺度，雪寺對雲庵。
安邑棗，沿庭柑，不愧對無慚。魏徵能直諫，王衍善清談。
紫梨摘去從山北，丹荔傳來自海南。
攘雞非君子所爲但當月一；養狙是山公之智止用朝三。

中對外，北對南，貝母對宜男。移山對浚井，諫苦對言甘。
千取百，二爲三，魏尚對周堪。海門翻夕浪，山市擁晴嵐。
新締直投公子紵，舊交猶脫館人驂。
文達淹通已詠冰兮寒過水；永和博雅可知青者勝於藍。

十四、鹽

悲對樂，愛對嫌，玉兔對銀蟾。醉候對詩史，眼底對眉尖。
風飄飄，雨綿綿，李苦對瓜甜。畫堂施錦帳，酒市舞青簾。
橫槊賦詩傳孟德，引壺酌酒尙陶潛。
兩曜迭明日東生而月西出；五行式序水下潤而火上炎。

如對似，減對添，繡幕對珠簾，探珠對獻玉，鷺立對魚潛。
玉屑飯，水晶鹽，手劍對腰鐮。燕巢依邃閣，蛛網掛虛檐。
奪槊至三唐敬德，奕棋第一晉王恬。
南浦客歸湛湛春波千頃淨；西樓人悄彎彎夜月一鉤纖。

逢對遇，仰對瞻，市井對閭閻。投簪對結綬，握髮對掀髯。
張繡幕，捲珠簾，石碣對江淹。宵征方肅肅，夜飲已厭厭。
心褊小人長戚戚，禮多君子屢謙謙。
美刺殊文備三百五篇詩詠；吉凶異畫變六十四卦爻占。

十五、咸

清對濁，苦對咸，一啓對三緘。煙蓑對雨笠，月榜對風帆。
鶯睨睨，燕呢喃，杞柳對松杉。清涼悲素扇，淚痛濕青衫。
漢室既能分四姓，周朝何用叛三監。
破的而探牛心豪矜王濟；豎竿以掛犢鼻貧笑阮咸。

能對否，聖對賢，衛瓘對瑋瑋。雀羅對魚網，翠巘對蒼巖。
紅羅帳，白布衫，筆格對書函。蕊香蜂競採，泥軟燕爭銜。
凶孽誓清聞祖逖，王家能義有巫咸。
溪與新居漁舍清幽臨水岸；山僧久隱梵宮寂寞倚雲岩。

冠對帶，帽對衫，議靦對言讒。行舟對御馬，俗弊對民喑。
鼠且碩，兔多毳，史冊對書緘。塞城聞奏角，江浦認歸帆。
河水一源形瀾瀾，泰山萬仞勢岩岩。
鄭爲武公賦緇衣而美德；周因巷伯歌貝錦以傷讒。